



SIARAN MEDIA

Dari Sempadan ke Pangkalan: LTAT Hargai Wira ATM Melalui Mahabbah Wira Ramadan

Fokus Utama:

- i. Pasukan sukarelawan Jalinan Wira LTAT menyantuni lebih 1,350 anggota ATM dan keluarga melalui majlis iftar serta pengagihan bubur lambuk di Tanah Merah, Gong Kedak dan Tanjung Gelang;
- ii. Program Taklimat Pencarum dan Celik Kewangan LTAT telah menjangkau lebih 55,000 anggota ATM sejak Disember 2023, menyokong agenda Ekonomi MADANI dan inisiatif GEAR-uP;
- iii. LTAT bersama Kumpulan Syarikatnya menyumbang RM420,000 kepada ATM sebagai sebahagian daripada sumbangan tahunan Aidilfitri; dan
- iv. Yayasan LTAT menyalurkan RM20,400 kepada 68 keluarga ATM dalam kategori asnaf, pesakit kronik dan orang kelainan upaya ("OKU") bagi meringankan beban sepanjang Ramadan.

KUALA LUMPUR, 6 MAC 2026 – Ramadan merupakan bulan untuk muhasabah, bersyukur dan berkongsi rezeki. Ia juga waktu yang terbaik untuk menghargai mereka yang berbakti mempertahankan kedaulatan negara. Memasuki penganjuran tahun ketiga, Lembaga Tabung Angkatan Tentera ("LTAT") meneruskan inisiatif Mahabbah Wira Ramadan ke tiga lokasi strategik di Pantai Timur, menyantuni lebih 1,350 anggota dan keluarga Angkatan Tentera Malaysia ("ATM") merangkumi Tentera Darat Malaysia, Tentera Udara Diraja Malaysia dan Tentera Laut Diraja Malaysia melalui majlis iftar, pengagihan bubur lambuk serta sokongan kebajikan.

Program selama tiga hari yang digerakkan oleh pasukan sukarelawan Jalinan Wira LTAT ini bermula pada 2 Mac di 1 Rejimen Sempadan, Kem Batu 11, Tanah Merah, Kelantan; diteruskan pada 3 Mac di Pangkalan Udara Gong Kedak, Jerneh, Terengganu; dan berakhir pada 4 Mac di Pangkalan TLDM Tanjung Gelang, Kuantan, Pahang. Lebih daripada sekadar acara berbuka puasa, program ini membuka ruang kepada LTAT untuk turun padang dan menyaksikan sendiri pengorbanan wira negara di lokasi penugasan masing-masing.

En. Mohammad Ashraf Md. Radzi, Ketua Eksekutif LTAT menegaskan kepentingan program ini dengan berkata *"Mahabbah Wira Ramadan bukan sekadar acara tahunan. Dalam melaksanakan tugas, ramai anggota tentera darat, laut dan udara tidak berpeluang menyambut Ramadan dan Syawal seperti kebanyakan rakyat Malaysia. Ketika negara meraikan, mereka tetap setia di pos masing-masing. Sebab itulah LTAT mendekati mereka, tanpa mengira jarak atau cabaran. Dedikasi mereka tiada batas, dan pengorbanan merekalah tunjang keamanan serta kedaulatan negara."*

"LTAT berdiri teguh bersama wira-wira ini agar mereka sentiasa tahu bahawa khidmat bakti mereka dihargai, dikenang dan dimuliakan. Kehadiran kami mungkin kecil berbanding pengorbanan besar yang mereka lakukan untuk negara," tambah beliau.

Di Tanah Merah, barisan kepimpinan LTAT turut melawat Pos Operasi Sempadan Renap bersama Panglima 8 Briged, Brigadier Jeneral Hj. Mohamad Nizam Hj. Abdul Manap, bagi meninjau peranan anggota yang mengawal keselamatan sempadan utara daripada ancaman dan aktiviti menyalahi undang-undang. Lebih 400 anggota dan keluarga diraikan dalam suasana penuh muhibah melalui majlis iftar dan pengagihan bubur lambuk yang disediakan oleh sukarelawan Jalinan Wira LTAT bersama warga kem.

Program kemudiannya diteruskan ke Pangkalan Udara Gong Kedak, yang menempatkan pesawat pejuang Su-30MKM "Toruk Makto". Di Hangar Skuadron 12, pasukan LTAT bersama Komander Pangkalan Udara Gong Kedak, Kolonel Hasfa Nyzam Abdul Hamid, menyantuni lebih 400 anggota serta krew teknikal yang memastikan kesiapsiagaan aset pertahanan udara negara sentiasa berada pada tahap tertinggi.

Jelajah Mahabbah Wira Ramadan melabuhkan tirainya di Pangkalan TLDM Tanjung Gelang, Kuantan, dengan kehadiran kira-kira 550 warga TLDM di Dewan Al-Haimi. Disambut oleh Panglima Wilayah Laut, Laksamana Muda Azman Rabani, kepimpinan LTAT turut menyerahkan bubur lambuk secara simbolik kepada Pegawai Pemerintah kapal kepada KD Perkasa sebagai tanda penghargaan kepada warga laut yang mempertahankan perairan negara.

Sebagai sebahagian daripada komitmen kebajikan menyeluruh, Yayasan LTAT menyalurkan sumbangan berjumlah RM20,400 kepada 68 keluarga ATM di ketiga-tiga lokasi melibatkan kategori asnaf, pesakit kronik dan OKU, bagi membantu meringankan beban mereka sepanjang Ramadan dan menjelang Syawal.

Selain itu, LTAT turut melaksanakan Program Taklimat Pencarum dan Celik Kewangan di setiap lokasi bagi memberi pendedahan mengenai pengurusan kewangan berhemah, perlindungan sosial dan persediaan persaraan. Sejak diperkenalkan pada Disember 2023, program ini telah menjangkau lebih 55,000 anggota ATM, selaras dengan Pelan Hala Tuju LTAT 2026–2030 ("GEMPUR30") dan aspirasi Ekonomi MADANI dalam memperkasa kesejahteraan kewangan pencarum untuk jangka masa panjang.

Melengkapkan usaha tersebut, LTAT bersama Syarikat Kumpulannya turut menyumbang sebanyak RM420,000 kepada ATM sebagai sumbangan tahunan Aidilfitri. Sumbangan ini akan diserahkan secara rasmi dalam satu majlis berasingan yang akan disaksikan oleh Menteri Pertahanan, YB Dato' Seri Mohamed Khaled Nordin, sebagai simbol sokongan berterusan LTAT kepada para perwira negara.

Melalui Mahabbah Wira Ramadan 2026, LTAT menegaskan komitmennya sebagai rakan strategik warga ATM, bukan sekadar pengurus dana persaraan, tetapi institusi yang memahami, menghargai, dan terus menyokong pengorbanan wira-wirawati negara di ketiga-tiga cabang perkhidmatan.

Sehingga kini, pasukan sukarelawan Jalinan Wira LTAT telah merekodkan lebih 2,300 jam khidmat sukarela yang disumbangkan oleh lebih 200 sukarelawan dalam kalangan warga kerja LTAT, mencerminkan komitmen berterusan dalam menyemai budaya prihatin dan tanggungjawab sosial.

-TAMAT-

Mengenai Lembaga Tabung Angkatan Tentera ("LTAT")

Ditubuhkan pada Ogos 1972 di bawah Akta Tabung Angkatan Tentera (Akta 101), Lembaga Tabung Angkatan Tentera ("LTAT") adalah sebuah badan berkanun yang bertanggungjawab menguruskan dana persaraan bagi pegawai dan anggota lain-lain pangkat Angkatan Tentera Malaysia ("ATM") serta para veteran. Untuk maklumat lanjut mengenai LTAT, layari www.ltat.gov.my.

PERHUBUNGAN MEDIA

Izzat Alhadjri

Pengarah,

Ketua Komunikasi Strategik

E-mel : izzat.alhadjri@ltat.gov.my

No. Tel : +603- 4815 8888

Laman web : www.ltat.gov.my